

Ain newes lied von den krayn- nerischen bauren.

Hört wunder zu/ der Baurn vnruue/ thet sich so ser aus praitn. In kurtz-
er zeit zu krieg vnd streit/ kham maniger her von weitten. Aus irer ge-
main/ thetn sy schreien Stara prauda/ ain yeder wolt sich rechen/ seines
hern gut nun schwechn. Leukhup leukhup leukhup leukhup woga gmai-
na/ mit gmainem rat sy khamen dar/ fur gschlösser marcht das ist war.

Der adel guet/ auss freyem muet/ thet sich gar stark auss schwingen/ er
macht das post/ war nit der letzt/ mit vechtn vnd mit ringen/ der Baurn
schar/ was rueffen dar. Stara prauda/ die lancknecht hetten prangen
mit spiessen vnd mit stangen. Leukhup. l. l. l. woga gmaina/ der Bauren
pundt was zer trent/ ir khainer west vmb das endt.

Der Baurn list/ man nit vergist/ zu singen vnd zu schreiben/ in irem müt
das edel pluet/ erdachten sy zu uertreiben/ sy schrayen ser ye lenger ye mer/
Stara prauda/ den geistlichn nit schencken/ ir nütz vñ gewin zu bedenck-
en. Leukhup. l. l. l. woga gmaina/ ir khainer sol ab wenden/ er müst den
krieg vor enden.

Der Bauren rat/ gar offt vnd drat/ gen Cili her thet schicken/ begert do-
vil/ ain selzam spil/ die stat thet sich erquicken/ mit püchsen güt/ sy schre-
cken thut. Stara prauda/ ain yeder schwür bey seinem ayd/ es solt der
stat werden layd. Leukhup. l. l. l. woga gmaina/ wir wellens frischlich
vahen an/ khainen darin leben lan.

Ains tags nit weyt nach vesperzeit/ die Bauren hetten herdringen/ wol
zu der stat/ in iamerß not/ vermaintn die zubezwingen/ mitirer macht/
ir hertz das lacht. Stara prauda/ pald was in entgegn gan/ man gsach
sy auss der walstat stan. Leukhup. l. l. l. woga gmaina/ ir püchßen wor-
den krachen/ das spil wil sich machen.

Gar pald darnach/ ain spil da gschach/ gar maniger ward erstochen/
auss der Bauren seyt/ in klainer zeit/ es het ain endt ir püchen/ etlich aus
In/ hetten klain gewin. Stara prauda. Sy haben die schantz verloren/
man hat in trucken gschoren. Leukhup. l. l. l. woga gmaina/ durch Ir
falsch sinn vnd arglist/ erhangen vnd auch gespist.



41185